

**“Mwy na Llyfrau” :**

**Strategaeth Gwasanaeth Llyfrgell a Gwybodaeth:**

**2016- 2020**

**Cyngor Gwynedd Council**

## 1. Cyflwyniad

Adolygodd Cyngor Gwynedd y Gwasanaeth Llyfrgell a Gwybodaeth ar draws yr awdurdod yn ystod 2013-2014. Mae'r adolygiad hwn wedi tynnu ynghyd barn defnyddwyr, cynghorwyr, staff a phartneriaid. Daeth yr adolygiad i'r casgliad nad oedd parhau i gynnal y gwasanaeth llyfrgelloedd yn ei ffurf bresennol yn gynaliadwy; a bod angen sefydlu cyfeiriad clir i'r Gwasanaeth wrth gynllunio i'r dyfodol gan ymateb i her datblygiadau digidol a chyfyngiadau cyllidol.

Yn dilyn gwaith yr adolygiad paratowyd Dogfen Ymgynghorol 'Mwy na Llyfrau' oedd yn amlinellu gweledigaeth a chynigion ar gyfer y dyfodol i Wasanaeth Llyfrgell Gwynedd. Cynhaliwyd ymgynghoriad cyhoeddus ar gynnwys y Ddogfen Ymgynghorol yng Ngwanwyn a Haf 2015 er mwyn mesur effaith unrhyw newid posibl; ynghyd a rhoi cyfle i bobl leol rannu eu safbwyntiau a'u syniadau cyn bod unrhyw benderfyniadau terfynol yn cael eu pennu.

Dylid nodi fod yr ymgynghoriad hwn wedi cymryd lle mewn cyfnod heriol iawn i'r Cyngor yn ariannol. Fel pob cyngor yng Nghymru, mae Cyngor Gwynedd yn wynebu toriadau sylweddol iawn yn y cyllid y mae'n ei gael tuag at dalu am wasanaethau lleol. Golyga hyn y bydd llawer llai o arian ar gael i dalu am y gwasanaethau hyn dros y blynyddoedd nesaf.

Mae'r cyfuniad o doriadau anferthol mewn cyllidebau a chynnydd sylweddol yn y galw am wasanaethau cyhoeddus yn golygu bod Cyngor Gwynedd yn wynebu bwlch ariannol sy'n cynyddu o flwyddyn i flwyddyn. Golyga hyn y bydd angen i Gyngor Gwynedd ddarganfod ffyrdd newydd creadigol o ddarparu gwasanaethau lleol wrth i'r cyllid sydd ar gael leihau.

## 2. Beth yw Gwasanaeth Llyfrgell?

Mae darparu Gwasanaeth Llyfrgell 'cynhwysfawr ac effeithlon' sydd yn annog a hyrwyddo oedolion a phlant i ddefnyddio'r gwasanaeth i'w eithaf yn ofyniad statudol o dan Ddeddf Llyfrgelloedd Cyhoeddus ac Amgueddfeydd 1964.

Dros yr hanner canrif ddiwethaf, mae llyfrgelloedd cyhoeddus wedi esblygu yn sylweddol. Erbyn hyn maent yn darparu ystod eang o wasanaethau megis:-

- Benthyc Llyfrau ac e-lyfrau
- Benthyc DVDs a Gemau Cyfrifiadurol
- Benthyc CDs llyfrau llafar a llyfrau llafar ar-lein
- Defnydd o bapurau newydd a chylchgronau yn cynnwys mynediad ar-lein
- Defnydd o gyfrifiaduron gyda mynediad am ddim i'r we ac e-bost
- Defnydd o feddalwedd swyddfa a chyfleusterau sganio ac argraffu
- Mynediad am ddim i Wi-Fi i ddefnyddio eich dyfeisiadau eich hun
- Mynediad ar-lein i adnoddau gwybodaeth o ansawdd uchel

- Sesiynau cyflwyno Technoleg Gwybodaeth a chefnogaeth anffurfiol
- Cymorth i'r sawl sy angen gwybodaeth gan gynnwys chwilio am swydd
- Digwyddiadau a gweithgareddau
- Amseroedd stori, canu a rhigwm
- Grwpiau darllen iechyd a lles
- Ymweliadau awdur a darlithoedd llenyddol
- Her Darllen Haf i blant oedran cynradd
- Ystafelloedd cymunedol i'w defnyddio
- Mynediad at erthyglau ymchwil academaidd
- 'Cyflwyniadau galw heibio' i adnoddau dysgu gydol oes

### 3. Gwasanaeth Llyfrgell Cyngor Gwynedd

Mae darpariaeth Llyfrgelloedd Gwynedd ar hyn o bryd yn cynnwys 17 llyfrgell a 4 llyfrgell symudol – sydd yn cynnwys Gwasanaeth i'r Cartref a Llyfrgell deithiol i blant ac ysgolion.

Yn ystod 2015-16

- derbyniodd llyfrgelloedd Gwynedd dros 375,000 o ymweliadau,
- benthycwyd dros 570,000 o eitemau
- darparwyd dros 100,000 o sesiynau ar y cyfrifiaduron cyhoeddus
- darparwyd dros 80,000 o sesiynau Wi Fi trwy wasanaeth Gwynedd Ddigidol.

Caiff perfformiad llyfrgelloedd Cymru eu hasesu yn flynyddol yn erbyn Fframwaith Safonau Llyfrgelloedd Cyhoeddus Cymru. Mae'r Safonau hyn yn mesur os ydy'r awdurdod yn cyfarch anghenion defnyddwyr y gwasanaeth.

Mae'r canlyniadau asesiad cenedlaethol diweddaraf - sef ar gyfer y cyfnod 2014-2015 yn nodi

“Roedd Gwynedd wedi cyflawni 16 o'r 18 hawl graidd yn llawn, a chyflawni Dau yn rhannol. O'r Saith dangosydd ansawdd sydd â thargedau, roedd Gwynedd wedi cyflawni Dau yn llawn, a Phump yn rhannol.” *“Er cyflawni'n gryf iawn yn y gorffennol, mae Gwynedd o drwch blewyn wedi methu rhai o'r targedau yn erbyn y fframwaith.. eleni. Mae'r awdurdod yn llwyddo i sicrhau defnydd da ar ei wasanaethau traddodiadol. Fodd bynnag, gall newidiadau yn y dyfodol effeithio'n andwyol ar y gwasanaeth sydd ar hyn o bryd yn perfformio'n dda, er gwaethaf lefelau staffio sy'n parhau i fod yn isel..”*

*“Mae problem barhaus nifer isel y staff yn cael ei nodi unwaith eto. O'i gymharu â pherfformiad cryf Gwynedd y llynedd, gallai perfformiad eleni fod yn dangos arwyddion o wasanaeth mewn sefyllfa fregus.”*

Yn ein harolwg defnyddwyr diwethaf yn 2013 roedd 95% o oedolion o'r farn bod y gwasanaethau'n dda neu'n dda iawn, a 92% o blant o'r farn bod eu llyfrgell yn 'dda'. Cynhelir yr arolygon barn nesaf ar gyfer Oedolion yn Hydref 2016 ac yr un ar gyfer Plant a Phobl Ifanc ym Mawrth 2017.

Dros y blynyddoedd diwethaf mae'r Gwasanaeth Llyfrgell wedi bod yn cyflawni arbedion ariannol er mwyn ymateb i'r cyfyngiadau ariannol y mae'r Cyngor yn ei wynebu. Mae'r Gwasanaeth Llyfrgell yn wynebu mwy o gyfyngiadau ariannol i'r dyfodol yn benodol yr angen i ganfod mwy o arbedion fel rhan o Strategaeth Ariannol y Cyngor ar gyfer 2014-15 i 2017-18.

Mae'r Gwasanaeth Llyfrgell hefyd wedi gweld toriad o 25% (£65,000) yn ei gyllideb i brynu stoc ac adnoddau yn ystod 2016-17. Sydd yn golygu bod yr awdurdod yn gwario yn llai na'r hyn sydd yn ddisgwyliedig gan y Safon Genedlaethol bresennol.

Wrth edrych i'r dyfodol mae angen i'r Gwasanaeth Llyfrgell fod yn barod i ymateb i her y datblygiadau digidol, yr her mewn newid yn arferion darllen a chyrchu gwybodaeth pobl, ac i'r heriau ariannol.

Pwrpas y Strategaeth hon felly yw gosod cyfeiriad i'r Gwasanaeth Llyfrgell a threfnu ein hunain yn llawer mwy effeithiol ac effeithlon er mwyn ymateb i'r heriau hyn ac i gyfarch anghenion trigolion Gwynedd oddi fewn i'r adnoddau sydd ar gael.

#### **4. Y weledigaeth i'r dyfodol - "Mwy na Llyfrau".**

**Gweledigaeth y Gwasanaeth yw 'Gwella ansawdd bywyd trigolion Gwynedd trwy gyflenwi gwasanaeth llyfrgell cynhwysfawr ac effeithlon'.**

Amcanion craidd y strategaeth hon yw :-

- Hyrwyddo darllen a mynediad at ddeunydd print a digidol i ddefnydd addysgol, hamdden ac iechyd a lles
- Darparu a chyfeirio trigolion at adnoddau gwybodaeth a darllen o'r ansawdd gorau
- Cefnogi a hybu'r defnydd o'r gwasanaeth a'i adeiladau fel mannau cymunedol anffurfiol a ffurfiol aml bwrpas a gwasanaethau y tu hwnt i lyfrau

Bydd y weledigaeth yma yn canolbwyntio ar 5 maes gwasanaeth allweddol sef:-

#### **Datblygu sgiliau digidol**

Mae gan lyfrgelloedd rôl allweddol i gefnogi pobl i ddatblygu sgiliau digidol; a'u cefnogi i gael mynediad i wybodaeth a gwasanaethau ar-lein, gan gynnwys y gwasanaeth llyfrgell rithiol lle mae'n bosib dewis llyfr drwy'r we. Bydd y gwasanaeth digidol fydd ar gael i ddefnyddwyr llyfrgelloedd Gwynedd yn cynnwys:

- Mynediad drwy'r We 24/7 i'r gwasanaeth llyfrgell ar gyfer rheoli cyfrif, cadw ac adnewyddu eitemau, a chwilio'r catalog ar-lein

- Modd i'r cyhoedd ymuno a chysylltu â'r gwasanaeth ar-lein / e-bost / facebook / twitter
- Darparu mynediad i'r We am ddim gan hybu cynhwysiant cymdeithasol
- Datblygu'r defnydd o, a mynediad at, dechnolegau symudol (e.e.tabledi)
- Darparu gweithgareddau ac ymgyrchoedd i ddatblygu sgiliau a chynhwysiad digidol ymysg unigolion (e.e. cyrsiau llythrennedd gwybodaeth ; TG sylfaenol)

### **Mynediad at wybodaeth**

Mae gan lyfrgelloedd rôl yn cefnogi pobl i gael mynediad at wybodaeth a gwasanaethau ar-lein yn y meysydd sy'n hanfodol i fywyd unigolion a'r economi leol - fel gyrfaoedd, swyddi, iechyd , gwybodaeth ariannol a budd-daliadau. Nod y gwasanaeth yw:

- Cynorthwyo pobl i gael mynediad at wybodaeth a gwasanaethau ar-lein gan gynnwys Universal Job Match a Chredyd Cynhwysol
- Cynghori pobl ar ganfod gwybodaeth
- Gweithredu fel 'Porth Gwybodaeth' i ddod a gwybodaeth gyhoeddus a gwybodaeth llywodraeth i gyrraedd trigolion lleol;

### **Hybu Iechyd a Lles Unigolion a Chymunedau**

Mae gan lyfrgelloedd rôl yn cefnogi pobl i fyw yn iach ac i hyrwyddo lles unigolion a chymunedau. Cyfrannu at hybu cydlyniant cymunedol, llesiant iechyd meddwl, cynhwysiant cymdeithasol, a'r iaith Gymraeg. Nod y gwasanaeth yw darparu:

- Gwasanaeth Llyfrgell i'r Cartref i bobl fregus
- Llyfrau ar Bresgripsiwn Oedolion a Theuluoedd
- Mynediad ar-lein a gynorthwyir a gweithgareddau hybu iechyd y cyhoedd
- Cynllun Gwybodaeth a Chyngor Iechyd a Lles (Macmillan ac eraill)
- Grwpiau Darllen Iechyd a Lles
- Detholiad o'r gorau o lenyddiaeth Cymraeg a chasgliadau dysgwyr Cymraeg

### **Hyrwyddo Darllen**

Mae gan lyfrgelloedd ddyletswydd i sicrhau mynediad am ddim i ddeunydd darllen ac i hyrwyddo darllen plant, pobl ifanc ac oedolion. Mae'r gwasanaeth yn cyfrannu at godi lefelau llythrennedd ymhlith plant a phobl ifanc trwy gynnig mynediad at adnoddau print a e-lyfrau am ddim. Nod y gwasanaeth yw -

- Cynnig llyfrau (print a digidol) am ddim ac adnoddau darllen
- Cynnig gofod cymunedol i drafod llyfrau a darllen
- Darparu mynediad i lyfrau a chylchgronau ar-lein
- Cefnogi'r ymgyrch - Pob Plentyn yn Aelod o Lyfrgell

- Darparu gwasanaethau i gynulleidfaoedd targed megis plant a'u teuluoedd; y dall a'r rhannol ddall.

## **Dysgu**

Mae llyfrgelloedd yn amcanu i ddatblygu a hyrwyddo eu rôl a'u cyfraniad i ddysgu gydol oes fel bod plant a theuluoedd ac oedolion yn gallu adeiladu eu hyder a'u sgiliau creadigol a'u sgiliau digidol. Mae'r cynnig hyn yn anelu i roi mwy o gyfleoedd i ddysgu mewn amrywiaeth o bynciau, ac yn arbennig i gynorthwyo'r llwybr o lythrennedd sylfaenol i ruglder. Mae'r Gwasanaeth eisoes yn cynnig:

- Darpariaeth amseroedd stori a rhigwm i blant ifanc a'u rhieni
- Cynnal gweithdai a gweithgareddau wedi'u hanelu at blant a theuluoedd
- Cyfeirio pobl at weithgareddau dysgu gydol oes mewn llyfrgelloedd ac yn y gymuned
- Cynnig cyfleodd dysgu anffurfiol yn y llyfrgell yn enwedig yn y maes technoleg ddigidol

## **5. Sut y byddwn ni'n darparu'r Gwasanaeth Llyfrgell i gyflawni'r Weledigaeth?**

Yn dilyn ymgynghori eang ar y strategaeth a mesur effaith unrhyw newid posib mae'r Strategaeth hon yn categoreiddio'r math o ddarpariaeth / llyfrgell y dymunwn i'r Gwasanaeth Llyfrgell ei ddarparu ar draws yr awdurdod. Mae'r categoreiddio hwn yn cyfarch disgwyliadau trigolion a defnyddwyr o'r gwasanaeth, ynghyd a'r disgwyliadau statudol. Mae'r categorïau hefyd yn cymryd ystyriaeth o'r canlynol :

- Poblogaeth a phatrymau demograffig
- Patrwm defnydd gan aelodau cyfredol llyfrgelloedd a phellter o lyfrgell
- Tueddiadau perfformiad e.e. nifer yr ymweliadau a benthyciadau fesul awr.
- Ystyriaethau cydraddoldeb e.e. grwpiau oedran 0-14 a rhai dros 65 / Iaith
- Amddifadedd a Mynediad at drafnidiaeth gyhoeddus

Mae'r categorïau wedi eu llunio o ymarfer da, ac yn ystyried argymhellion gan Lywodraeth Cymru yn eu hadroddiad diweddaraf ar ddyfodol gwasanaethau llyfrgell gyhoeddus yng Nghymru 'Pennu Cwmpas Gwasanaeth Llyfrgelloedd Cyhoeddus Newydd i Gymru'

Mae'r Strategaeth hon yn nodi y bydd Gwasanaeth Llyfrgell Cyngor Gwynedd yn symud i batrwm darparu sy'n cynnwys :

### **A. Llyfrgell Dalgylch**

### **B. Llyfrgell Gymunedol o dan reolaeth y Cyngor**

### **C. Gwasanaethau Teithiol i Oedolion a Phlant**

Mae'r tabl isod yn disgrifio'r ddarpariaeth yn ôl pob categori:

Categori :	Y Cyfleusterau fydd ar gael:-
<p><b>Llyfrgell Dalgylch</b></p> <p>Gyda : dros 20,000 Ymweliadau Blynyddol</p> <p>dros 25,000 Benthyciadau Blynyddol</p> <p>dros 5,000 sesiwn Defnydd Cyfrifiaduron</p> <p>Costau'r pen fesul defnyddiwr yn llai na £2.00 ar gyfartaledd</p>	<ul style="list-style-type: none"> <li>• Gwasanaethu poblogaeth dros 5,000 o fewn dalgylch 3 milltir neu chwarter awr o deithio trafniadaeth gyhoeddus</li> <li>• Y llyfrgell wedi'i lleoli mewn ardal prif ganolfan siopa i'r dalgylch.</li> <li>• Oriau agor o leiaf 20 awr hyd at o leiaf 40 awr yn y canolfannau mwyaf</li> <li>• Arwynebedd llawr - o leiaf 150m<sup>2</sup> i lyfrgell sydd yn gwasanaethu poblogaeth lai na 20,000 ac o leiaf 300m<sup>2</sup> i lyfrgell yn gwasanaethu dros 20,000</li> <li>• O leiaf 10,000 o eitemau o stoc mewn amrywiaeth eang o fformatau, gyda rhwng 10,000 a 15,000 o eitemau o stoc yn y llyfrgelloedd mwyaf.</li> <li>• Cyswllt i e-lywodraeth ac e-ddysgu a darpariaeth casgliadau arbenigol, ee - Hanes Lleol, lechyd a Lles, setiau o lyfrau ar gyfer Grwpiau Darllen,</li> <li>• O leiaf 8 cyfrifiadur ar gael i'r cyhoedd gydag o leiaf 16 cyfrifiadur yn y llyfrgelloedd mwyaf</li> <li>• Gwasanaeth diwifr yn rhad ac am ddim a gofod i ddefnyddio glinfyrddau a thabledi personol</li> <li>• Pwyntiau hunanwasanaeth</li> <li>• Gofod cynnal gweithgareddau o fewn yr adran Plant neu fynediad at ofod priodol</li> <li>• Gofod, neu fynediad at ofod, ar gyfer cynnal digwyddiadau cymunedol a chelfyddydol</li> <li>• Ystyriaeth barhaus i gyd-leoli â gwasanaethau neu bartner cyffelyb sy'n ymwneud â'r cyhoedd</li> </ul>
<p><b>Llyfrgell Gymunedol</b></p> <p>Gyda :- dros 10,000 Ymweliadau Blynyddol</p> <p>dros 15,000 Benthyciadau Blynyddol</p> <p>dros 1500 sesiwn Defnydd Cyfrifiaduron</p> <p>Costau'r pen fesul defnyddiwr yn llai na £3.00 ar gyfartaledd</p>	<ul style="list-style-type: none"> <li>• Gwasanaethu poblogaeth rhwng 2,000 a 5,000 o fewn 3 milltir</li> <li>• Y llyfrgell wedi'i lleoli ger canol y dref/ pentref neu yn / wrth ymyl canolfan gymunedol/ysgol</li> <li>• Oriau agor : lleiafswm o 15 awr</li> <li>• Arwynebedd llawr - o leiaf 75m<sup>2</sup></li> <li>• O leiaf 5,000 o eitemau o stoc</li> <li>• O leiaf 6 cyfrifiadur ar gael i'r cyhoedd</li> <li>• Gwasanaeth diwifr yn rhad ac am ddim</li> <li>• Amrywiaeth o ffynonellau gwybodaeth ar bapur ac ar-lein</li> <li>• Elfen hunanwasanaeth yn dibynnu ar anghenion lleol ac ar unrhyw ddefnydd arall mae'r gymuned yn ei wneud o'r safle.</li> <li>• Man i gynnal cyfarfodydd cymunedol neu ddigwyddiadau pan fo hynny yn bosib</li> <li>• Wedi'i chyd-leoli â phartneriaid o'r cyngor neu'r gymuned pan fo hynny yn bosib</li> <li>• Defnydd o wirfoddolwyr ar gyfer gweithgareddau atodol yn unig</li> </ul>

<p><b>Llyfrgelloedd Teithiol i'r Gymuned</b></p>	<ul style="list-style-type: none"> <li>• Gwasanaethu Poblogaeth rhwng 200 a 1000 o fewn chwarter milltir o bellter cerdded</li> <li>• Oriau mynediad - rhwng chwarter a tri chwarter awr.</li> <li>• Dewisir arosfannau yn seiliedig ar ddefnydd blaenorol, pellter o adeilad llyfrgell, mynediad at drafnidiaeth gyhoeddus ac ystyriaethau iechyd a diogelwch.</li> <li>• Ymwelir yn fisol a phob cymuned</li> </ul>
<p><b>i'r Cartref</b></p>	<ul style="list-style-type: none"> <li>• Cynnir 'Gwasanaeth i'r Cartref' ar gyfer y rhai hynny sydd anabl ac felly yn gaeth i'w aelwydydd.</li> <li>• Ymwelir yn fisol</li> </ul>
<p><b>i Blant a Phobl Ifanc</b></p>	<ul style="list-style-type: none"> <li>• Un Cerbyd Plant a Phobl Ifanc (Lori Ni ) i'r awdurdod cyfan</li> <li>• Ymwelir â phob ysgol gynradd i fenthyg llyfrau a phob ysgol uwchradd i gyflwyno gwybodaeth.</li> <li>• Hyd ymweliad i ysgol yn seiliedig ar nifer disgyblion.</li> </ul>

Drwy ddefnyddio meini prawf clir ar gyfer y categorïau mae'r strategaeth hon yn cynnig cynnal Naw Llyfrgell Dalgylch yn Bangor, Caernarfon, Porthmadog, Pwllheli, Dolgellau, Blaenau Ffestiniog, Tywyn, Abermaw ac Y Bala , Pedair Llyfrgell Gymunedol yn Bethesda, Penygroes, Nefyn a Cricieth a Gwasanaethau Teithiol fel y ffordd ddarparu fwyaf cynhwysfawr ac effeithlon ar gyfer Gwasanaeth Llyfrgell Gwynedd oddi fewn i'r gyllideb sydd ar gael.

Mae'r Strategaeth yma yn golygu newid ar draws y rhwydwaith o lyfrgelloedd. Byddwn yn rhesymoli a chwtogi oriau agor ymysg y llyfrgelloedd dalgylch, yn rhesymoli oriau gyda'r llyfrgelloedd cymunedol ac yn adolygu arosfannau y Gwasanaethau Teithiol.

Mae defnyddio'r categoreiddio hwn fel sail i adolygu lleoliadau'r llyfrgelloedd sefydlog hefyd yn adnabod y lleoliadau hynny nad oes modd i'r Gwasanaeth Llyfrgell barhau i'w cynnal fel ag y maent ar hyn o bryd. Mae'r Strategaeth wedi adnabod mewn 4 cymuned fod y ddarpariaeth bresennol o gynnal gwasanaeth llyfrgell o adeilad pwrpasol yn dod i ben, ond oherwydd yr effaith cymdeithasol i hyn rydym yn cynnig categori Dolen Cymunedol er mwyn lliniaru'r effaith ar y gymuned ac er mwyn cynnal mynediad trigolion y gymuned honno drwy ddulliau amgen i'r gwasanaeth.



Categori :	Y Cyfleusterau fydd ar gael:-
<b>Dolen / Cyswllt Cymunedol</b>	<ul style="list-style-type: none"> <li>• Gwasanaethu poblogaeth rhwng 1000 – 2000 o fewn milltir o daith cerdded</li> <li>• Cynnal Gwasanaeth clicio a chasglu gyda phartner a/neu'r gymuned leol</li> <li>• Hunanwasanaeth fel prif elfen y ddarpariaeth gyda phartner / gymuned leol pan fo hyn yn ymarferol</li> <li>• Trefnu gwasanaeth amgen gan yr awdurdod drwy'r Gwasanaeth teithiol misol; Gwasanaeth i'r Cartref, Gwasanaeth Teithiol i blant (Lori Ni)</li> <li>• Cyfrifiaduron gyda mynediad at y We ar gael i'r cyhoedd drwy asiantaeth arall wedi ei gefnogi gan yr awdurdod</li> </ul>

Mae'r Strategaeth yma yn cynnig gwasanaeth craidd sydd a'r gallu i wynebu her yr oes ddigidol. Mae'n ddyletswydd statudol ar yr awdurdod leol i hybu'r gwasanaeth llyfrgell gyhoeddus - bwriedir felly cynnal cynllun i hyrwyddo'r hyn sydd ar gael o lyfrgelloedd a cheisio cynnal ymgyrchoedd marchnata penodol dros gyfnod y strategaeth i gynyddu aelodaeth a defnydd .

Bydd darparu Gwasanaeth Llyfrgell sydd yn gweddu ag anghenion y Ddeddf Llesiant Cenedlaethau'r Dyfodol 2015 yn cael ei ystyried gydol y Strategaeth hon. Mae'r Ddeddf hon yn ymwneud â gwella llesiant cymdeithasol, economaidd, amgylcheddol a diwylliannol Cymru.

Bydd y Ddeddf yn sail i'r Fframwaith Safonau Llyfrgell ar gyfer 2017 ymlaen a'r Strategaeth Cenedlaethol ar gyfer Datblygu Llyfrgelloedd a ddarperi gan Lywodraeth Cymru .Bydd y Gwasanaeth felly yn amcanu i gydweithio'n well; cynnwys pobl, gan adlewyrchu amrywiaeth ein cymunedau; edrych ar bethau yn yr hirdymor yn ogystal â chanolbwyntio ar y sefyllfa ar hyn o bryd; cymryd camau i geisio rhwystro problemau - neu eu hatal rhag digwydd yn y lle cyntaf.

Bydd mabwysiadu y Strategaeth felly yn ymateb i ofynion cyffredinol y Ddeddf i feddwl yn y tymor hir, gweithio'n well gyda phobl a chymunedau, ceisio atal problemau a dilyn dull gweithredu cyson a chyflawni hyn mewn dull cynaliadwy.

